

Wolf - Rosenstein

I.

Qant la douch?aura s?amarcis,
e·l fuoilla chai de sul verzan,
e l?aucel chanjan lor latis,
ez ieu de sai sospir e chan
d?amor qi·m ten lachat e pres,
q'ieu anch no l?hagui en poder.

II.

Las! q?ieu d?amor non hai conquis
mas can lo trebaill e l?affan;
ni res tan greu no·s convertis
com fai cho q?ieu vauc deziran;
ni tal enveia no·m fai res
cum fai cho q?ieu non puosc haver.

III.

Per una joia m?esbaudis,
fina, q?anch ren no amei tan;
qant son ab lei si m?esbaïs
q?eu no·ill sai dire mon talan,
e qant m?en vauc vejaire m?es
qe tot perda·l sen e·l saber.

IV.

Tota la gencer q'anc hom viz,
encontra lei no prez un gan;
qan tot lo siegles brunezis,
delai on il es si resplan;
Dieu prejarai q'anquar la·m des,
o qe la vei?anar jaser.

V.

Totz tressaill e bram e fremis
per s?amor, dormen e veillan;
tal paor hai q?ieu mesfaillis,
no m?aus pessar cum la deman;
mais servir l?ai dos ansz o tres,
e puous be leu sabra·n lo ver.

VI.

No muer ne viu e no guaris,
e mal non sen e si l?hai gran,

qar de s'amor no soi devis;
no sai si ja l'haurai ni qan;
q'en leis es tota la merces
qe·m pod sorzer o dechaszer.

VII.

Bel m'es qant ilh m'afolletis,
e·m fai badar, e·n vau muszan;
de leis m'es bel si m'escharnis,
o·m gaba derers o denan;
q'apres lo mal me venrra·l bes
be leu, s'a leis ve a plaszer.

VIII.

S'ella no·m vol, volgra moris
lo dia qe·m pres en coman;
hai lass! tan soavet m'aucis
qan de s'amor me fesz scemblan;
qe tornat m'ha en tal debes,
qe nuill altra non voill veszer.

IX.

Totz cossiros soi e jaucis,
qar s'ieu la doptei o la blan,
per lei serai o fals o fis,
o dreichurers o ples d'enjan,
o totz villa o totz cortes,
o trabaillos o de leszer.

X.

Mais cui qe plaja o cui qe pes,
ela·m pod, si·s vol, retener.

XI.

Cercalmont ditz: greu er cortes
hom qe d'amor se desesper.

- letto 778 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/wolf-rosenstein-1>